

Преподобномученики Серафим (Булашов), Иоасаф (Крымзин)
и Петр (Мамонтов)

На велицей вечерни

На Господи, воззвах: стихиры на 8, глас 1.

Подобен: Небесных чинов радование:

Преподобнии мученицы Христови,/ волю свою в руке Божия предавше,/ подвигом добрым подвизастесь/ и, кровь свою пролиивше,/ венцами доблыми увязостесь./ Темже, велию милость приемше,/ Престолу Господа предстоите/ и молитесь о душах наших.

Преподобнии мученицы Христови,/ во иночестем лице усердне потрудившися,/ в скорбех и гонениях веру Православную сохранили есте/ и, крест свой на рамена взявше,/ любовь Божию, яже есть крепльши смерти, явили есте./ Ныне, в Чертозе Небеснем пребывающе,/ Престолу Господа предстоите/ и молитесь о душах наших.

Преподобнии мученицы Христови,/ в смирении и кротости Небесному Владыце подражающе,/ огненные стрелы злобы угасили есте/ и, заповеди Господни соблюдающе,/ диавола мужественно посрамили есте./ Ныне в Горних селениях пребываете/ и Престолу Господа предстоите,/ молящися о душах наших.

Преподобнии стратотерпцы,/ цветы райстии сада Христова,/ Серафиме, Иоасафе и Петре,/ благоуханием подвигов и страданий ваших,/ Церковь Русскую украсили есте/ и Отечество ваше земное прославили есте./ Темже молитесь Христа Бога/ да спасет души наша.

Слава, глас 8:

Приидите, христоименитии людие,/ прославим преподобномучеников Гуслицких,/ иже, заповеди Христовы сохранивше,/ в Царствие Божие внидоша/ и мзду обещанную прияша./ Ныне, в лице святых почивающе,/ прославляют Отца и Сына и Святаго Духа,/ Троицу Единосущную и Нераздельную.

И ныне, Богородичен: Царю Небесный:

Вход. Прокимен дне. И чтения три мученическая.

На литии стихира храма.

На стиховне стихиры, глас 5.

Подобен: Радуйся, Живоносный Кресте:

Радуйтесь, новомученицы Гуслицтии,/ теплии заступницы наши,/ Царствия Небеснаго наследницы,/ Духа Святаго причастницы,/ велие дерзновение ко Спасу имущии!/ Молитесь о Церкви Русстей,/ да слово истины ею неустанно возвещается,/ христоименнии людие в вере Православней утверждаются/ и в единомыслии Бога прославляют.

Стих: Честна пред Господем/ смерть преподобных Его.

Радуйтесь, новомученицы Гуслицтии,/ Серафиме, Иоасафе и Петре,/ ангели земнии и человецы Небеснии!/ Вы, жертву безкровную усердне приносивше,/ жертва живая Господеви соделастесь/ и кровь вашу за веру пролиясте./ О, преподобнии мученицы Христови,/ испросите нам прощение согрешений,/ яко предстателие наши теплии пред Господем.

Стих: Блажен муж, бояйся Господа,/ в заповедех Его восхощет зело.

Радуйтесь, преподобнии мученицы Христови!/ Вы, соблазны лукаваго отвергше,/ крест свой мужественне подъяли есте/ и, в темнице заточение претерпевше,/ лютыя смерти не убоялися есте./ Темже, яко жертвы непорочныя Господу принесешся,/ ныне во обителях Небесных пребываете/ и нас на подвиги доброделания/ молитвами вашими укрепляете.

Слава, глас 2:

Егда оскуде вера в земли нашей,/ беззаконнии воздвигоша брань братоубийственную/ и востаха на христоименитыя люди,/ тогда новомученицы и исповедницы преславнии,/ ревностию о Бозе вооружившися,/ мужественне подвизашася,/ да утвердится Церковь Русская.

И ныне, Богородичен, глас тойже: О, чудесе новаго:

Тропарь, глас 4:

Днесь светло красуется обитель Гуслицкая/ прославляющи преподобных мученик своих,/ Серафима, Иоасафа и Петра,/ тии бо, гонений многоразличных

и смерти не убоявшеся,/ веры Православныя твердии исповедницы явишася/ и, крест страдания на месте мучения в Бутове подъемше,/ венцы нетленными от Христа увязошася./ Темже, новомученицы святии,/ молитве Всемилостивого Спаса/ долгов разрешения нам даровати/ и душам нашим велию милость.

На утрени

По 1-м стихословии седален, глас 1:

Семя евангельское всем сердцем восприимше, преподобномученицы добропобеднии, благодатию Духа Святаго возрасли есте, воздержанием же и терпением, яко клас зрелый, в житницу Небесную принесени бысте. Темже, со всеми святыми ликовствующе, молитве спастися душам нашим.

Слава, и ныне, Богородичен:

Настави ны на путь покаяния, уклоняющихся присно к безпутием зол и Преплагаго Господа прогневающих, Неискусобрачная Благословенная Марие, Заступнице Усердная рода христианскаго.

По 2-м стихословии седален, глас 7:

Кто достойную похвалу принесет подвигом вашим, преподобнии страдальцы? Вы бо, евангельски неключимыя рабы себе почитающе, твердым исповеданием веры даже до смерти Христу угодили есте. Темже любовию величаем вас, теплых молитвенников о душах наших.

Слава, и ныне, Богородичен:

Стена и покров еси, Владычице, и пристанище небурное всем, в бедах сущим и к Твоему заступлению с верою притекающим. Темже и мы усердно вопием Ти: соблюди землю Русскую в Православии и единомыслии, Дево Пречистая.

Величание:

Величаем вас,/ преподобномученицы Серафиме, Иоасафе и Петре/ и чтим подвиги и страдания ваша,/ яже за Христа/ претерпели есте.

Псалом избранный:

1-й лик: Весть Господь путь праведных и путь нечестивых погибнет.

2-й лик: Работайте Господеви со страхом и радуйтесь Ему с трепетом.

1-й лик: Ты же, Господи, Заступник мой еси, Слава моя и возносяй главу мою.

2-й лик: Помилуй мя, Господи, яко немощен есмь, исцели мя, Господи, яко смятошася кости моя.

1-й лик: Отступите от мене вси делающие беззаконие, яко услыша Господь глас плача моего.

2-й лик: Господи, Боже мой, на Тя уповах, спаси мя от всех гонящих мя и избави мя.

1-й лик: Помощь моя от Бога, спасающаго правыя сердцем.

2-й лик: Да уповают на Тя знающие имя Твое, яко не оставил еси взыскающих Тя, Господи.

1-й лик: Ты, Господи, сохраниши ны и соблюдеши ны от рода сего и во век.

2-й лик: Воздаст ми Господь по правде моей и по чистоте руку моею воздаст ми.

1-й лик: С преподобным преподобен будеши и с мужем неповинным неповинен будеши.

2-й лик: Закон Господень непорочен, обращаяй души, свидетельство Господне верно, умудряющее младенцы.

По полиелеи седален, глас 4:

Обитель Гуслицкая ныне торжествует, прославляющи преподобныя мученики своя, тии бо, на месте сем начало подвигом положивше, поты и слезами души своя возделаша, послежде, страдания и изгнания правды ради претерпевше, кровию своею землю Бутовскую обagriша. Темже, святии, молитесь за ны ко Господу.

Слава, и ныне, Богородичен:

На Тя, Богородице, упование возлагаем, вернии людие, да не постыдимся никогдаже, но имуще Тя Покров и Стену Нерушимую, вопием Ти: радуйся, Благодатная, Господь с Тобою.

Степенна, 1-й антифон 4-го гласа. Прокимен, глас 4: Честна пред Господем/

смерть преподобных Его. **Стих:** Что воздам Господеви о всех,/ яже воздаде ми?

Всякое дыхание: Евангелие от Марка, зачало 37.

По 50-м псалме стихира, глас 6:

О, преподобнии мученицы Христови,/ Серафиме, Иоасафе и Петре,/ ангели земнии и человецы небеснии!/
Вы, жертву безкровную усердне приносивше,
жертва живая Господеви соделастесь/
и кровь вашу за веру пролиясте./
Ныне же, во свете невечернем пребывающе,
теплии предстателие наши,
поминайте совершающих честную память вашу.

Канон, глас 4.

Песнь 1

Ирмос: *Моря чермную пучину/
невлажными стопами/
древний пешешествовав Израиль,
крестообразныма Моисеовыма руками/
Амаликову силу в пустыни победил есть.*

Припев: Святити преподобномученицы Серафиме, Иоасафе и Петре, молитв Бога о нас.

Три мученицы преподобнии, благодатию Живоначальныя Троицы явственнo просвещаеми, терпеливнo за веру Христову подвизашася и леств безбожнoу мужественнo посрамиша.

Подвиги вашими и кровьми мученическими земля Гуслицкая освятится, вы же, на Христа все упование возложивше, во обители Небеснаго Отца вселилися есте.

Яви нам Господь преподобных отцев Серафима, Иоасафа и Петра и венцами победными их увенча, да прославим Бога, дивнаго во святых Своих, и исправимся покаянием.

Богородичен: Паче ума родила еси, о Дево, и по рождестве явилася еси, девствующи паки. Тем немолчными гласы, радуйся, Тебе, Владычице, верою несомненною вопием.

Песнь 3

Ирмос: *Веселится о Тебе Церковь Твоя, Христе, зовущи:/ Ты моя Крепость, Господи,/ и Прибежище, и Утверждение.*

На Бога упование возлагая, преподобномучениче Серафиме, подвиги постническими и страданиями за Христа веру пламенеющую стяжал еси, сего ради во обителях Небесных с безплотными лики веселишися.

На камени веры утвердився, преподобне Петре, и мужественно гонения претерпевая, вечнующаго утешения сподобился еси, темже и нас в Православней вере утверди.

Неправедному судищу предстоя, Бога Единого Судию имел еси, отче Иоасафе, и, путем Господним шествуя, соблазны безбожных отринул еси. Сего ради вкупе с новомученики тя величаем.

Богородичен: Смиренно приношу Ти моление, благоутробная Мати, и к Твоему прибегаю милосердию: не отврати мя, неразумнаго, от лица Твоего.

Седален, глас 8:

Мирскаго мятежа удалившися, новомученицы Церкви Русския, преподобнии Серафиме, Иоасафе и Петре, едино на потребу взыскали есте и благую часть в Царствии Небеснем наследовали есте.

Слава, и ныне, Богородичен:

О, Всепетая Богородице Владычице, преподобных похвало, мучеников славо, Ангелы восхваляемая и человеки воспеваемая, и всего мира крепкая Помощнице, избави Церковь Русскую всякаго злаго обстояния, Единая Благословенная.

Песнь 4

Ирмос: *Вознесена Тя видевши Церковь на Кресте,/ Солнце праведное,/ ста в чине своем,/ достойно взывающи:/ слава силе Твоей, Господи.*

Троицы равночисленнии, преподобнии отцы Гуслицтии, тремя добродетельми Духа Святаго светло украшеннии, верою несумненною, надеждою известною, любовью нелицемерною в мире просияли есте.

Исповедающе небоязненно Христа Бога нашего, твердою верою все безбожие мучителей попрасте, преподобнии отцы, и венцы нетленные обретосте.

С благоговением притецем, вернии, к светоносным отцем и светозарным мучеником, тьму бо страстей наших разгоняют и пети нас подвизают: слава силе

Твоей, Господи.

Богородичен: Обновляет человечество ново Отроча превечный Бог, явлься от Девы и Человек быв. Тому воспоим: слава силе Твоей, Господи.

Песнь 5

Ирмос: Ты, Господи, мой свет,/ в мир пришел еси,/ Свет Святый, обращаай из мрачна неведения/ верою воспевающия Тя.

Воини искуснии Царя Небеснаго, новомученицы Церкви Русския, полк Божественный составивше и верою Христовою вооружившися, свободите от рабства диавольскаго люди, безбожием плененныя.

Благодать Святаго Духа возсия в сердцах ваших, преподобнии страдальцы, сего ради, ран и мучений телесных не убоявшися, узкими вратами и тесным путем Горняго Сиона достигли есте.

Яко чада Божия непорочна, святии новомученицы, неповинни и цели, посреде рода строптива и развращенна, якоже светила в мире, явились есте.

Богородичен: О, Владычице Богородице, буди нам щит и заступление во дни испытаний, находящих на ны, разве бо Тебе иного предстательства не вемы.

Песнь 6

Ирмос: Пожру Ти, со гласом хваления, Господи,/ Церковь вопиет Ти,/ от бесовския крове очищися,/ ради милости от ребр Твоих/ истекшею Кровию.

Волны нечестия и безбожия сокрушишася о камень веры твоея, святе Петре, темже и благодать за ны молитися приял еси.

Егда разлучиша безбожнии душу твою от телесе, отче Серафиме, паче Богу соединился еси, достолаженне, и Христа приобрел еси. Темже молися о почитающих тя.

Житие и страдания твоя, преподобне Иоасафе, украсиша Церковь Русскую, сего ради с новомученики ты величаем.

Богородичен: Смирненно приношу Ти моление, благоутробная Мати, и к Твоему прибегаю милосердию: не отврати мя, неразумнаго, от лица Твоего.

Кондак, глас 6:

Преподобномученицы Твои, Господи,/ руганием и ранами искушения

многая прияша,/ еще же узами и темницею томими быша./ Обаче, даже до крове противу греха подвизавшеся,/ правду содеяша и Воскресению Твоему приобщисася./ Тех молитвами, Христе Боже,/ даруй нам с терпением предлежащий подвиг совершити/ и Царствия Небеснаго достигнути.

Икос:

Яко доблии оружницы Бога нашего,/ преподобномученицы преславнии,/ Серафиме, Иоасафе и Петре,/ подвиги вашими ко Христу востекли есте,/ ныне же, Престолу Божию предстояще,/ обитель вашу в мире сохраните/ и молитесь о нас, любовию вас почитающих и вопиющих сице:

радуйтесь, страстотерпцы Христа Бога нашего;

радуйтесь, венец нетленный от Него приемшии.

Радуйтесь, Православия непобедимии исповедницы;

радуйтесь, Царствия Небеснаго наследницы.

Радуйтесь, земли Московския доброе прозябение;

радуйтесь, обители нашея преславное украшение.

Радуйтесь, прибегающих к вам мудрии наставницы;

радуйтесь, призывающих вас скории помощницы.

Радуйтесь, преподобномученицы преславнии, обители Гуслицкия похвало и утверждение.

Песнь 7

Ирмос: В пещи Авраамстии отроцы персидстей/ любовию благочестия паче,/ нежели пламенем, опаляеми, взываху:/ благословен еси в храме славы Твоя, Господи.

Раскольническая мудрования отринув, отче Серафиме преподобне, истину в Церкви Православней обрел еси и, иноческия обеты прилежно исполняя, до конца верен и послушлив Господеви пребыл еси, во дни же гонений лютых венца мученическаго сподобился еси.

Милосердный Господь, видя страдания и болезни твоя, десною Своею рукою покры ты, преподобномучениче Иоасафе, и во огни лютых испытаний помощь ти подаде.

Прещений и клеветы мучителей не убоаяся, преподобномучениче Петре, воли Господней всего себе предал еси и, силою Животворящаго Креста укрепляемь, всех научал еси Христу вопити: благословен еси, Боже отец наших.

Богородичен: На Тя, Богородице, упование возлагаем, вернии людие, да не постыдимся никогдаже, но, имуще Тя Покров и Стену Нерушимую, вопием Ти: радуйся, Благодатная, Господь с Тобою.

Песнь 8

Ирмос: Руце распротер Даниил,/ львов зияния в рове затче;/ огненную же силу угасиша,/ добродетелию препоясавшися,/ благочестия рачители, отроцы, взывающе:/ благословите, вся дела Господня, Господа.

Божественною любовью распалаеми, древним отцем уподобилися есте, преподобнии страдальцы, и лютая мучения претерпели есте. Темже молите Господа, да не оскудеет в земли Русстей вера Православная.

Дадесе вам благодать, преподобномученицы святии, не токмо во Христа веровати, но и о Нем страдати, темже, узы тяжкия и смерть лютую претерпевше, ныне во Царствии Небеснем радуетесь и веселитесь, мзду многую обретше.

Словеса Давидова приемлюще, се что добро или что красно, но еже жити братии вкупе, вы, преподобнии, в душе братолюбия иноческий подвиг совершали есте, темже, любовь Христову стяжавше, за веру истинную мужественне пострадали есте.

Богородичен: Егда приидеши во славе судити всяческая, Владыко Господи, десным овцам сопричти мя, грешнаго, Матере Твоея мольбами, да славлю Тя во веки.

Песнь 9

Ирмос: Камень нерукосечный/ от несекомья горы, Тебе, Дево,/ краеугольный отсечеса, Христос,/ совокупивый разстоящая естества,/ тем, веселящися, Тя, Богородице, величаем.

Заповедь Господню исполняюще, преподобнии страсотерпцы, крест свой на рамена взяли есте и стопам Христовым последовали есте, достославнии.

Оболгания, хуления и истязания многая претерпевше, преподобнии

страдальцы, Христа подвиги вашими прославили есте. Егоже о нас прилежно молитесь, да спасет души наша.

Аще и телом сокрушени бысте, обаче светлость ваша душевная возсия благодатию Духа Святаго. Темже Христа Бога молитесь землю Русскую от проказы безбожия исцелити, преподобномученицы блаженнии Серафиме, Иоасафе и Петре.

Богородичен: Богородице Дево, моли Сына Твоего и Бога нашего со всеми святыми в земли Русстей просиявшими, да избавит Отечество наше от неверия и сохранит нерушиму Церковь Православную.

Светилен:

Света преумнаго зарею просвещаемии, преподобномученицы Гуслицтии прехвальнии, в нощи гонений безбожных, яко светильницы Христови многосветлии, явились есте и, страданьми своими землю нашу просветивше, тьму нечестия в ней разсеяли есте.

Слава, и ныне, Богородичен:

Под Твою милость прибегаем, Богородице Дево, молений наших не презри в скорбех, но от бед избави нас, Едина Чистая и Благословенная.

На хвалитех стихире, глас 1:

Отче Серафиме прехвальне,/ преподобный мучениче Христов,/ оклеветан от безбожных быв,/ поношение претерпел еси,/ за врагов же моляся,/ кончину мученическую приял еси/ и яко жертва благоприятная Господеви принеслся еси./ Темже поминай нас, чтущих святую память твою.

Преподобне отче Иоасафе,/ путь монашества от юности избрав,/ житием добродетельным достойныя плоды Владыце принесл еси,/ обаче Христос путь превосходнейший уготова ти,/ венцем страдания украсив./ Ныне же, пастырю наш добрый,/ во святых обителях пребываеши/ и имаши велию милость ко Господу молитися за ны.

Мучениче Христов, преподобне отче Петре,/ измлада Бога возлюбив,/ вся мирская во уметы вменил еси/ и, во обитель Гуслицкую пришед,/ иноческаго звания сподобился еси./ Во дни же гонений на Церковь Русскую/ прещений

безбожных не убоявша, / твердость в вере показал еси. / Темже молися, преподобномучениче, / от страстей греховных нам избавитися / и жизни вечная сподобитися.

Яко звезды пресветлыя, / на тверди церковней возсияли есте, / новомученицы Гуслицтии, / вы бо, Истины поборницы явившеся, / безбожных козни сокрушили есте / и нечестие в земли нашей обличили есте. / Темже, Царствия Небеснаго достигше, / молитесь Милостиваго Бога, / грехов оставление нам даровати / и спастися душам нашим.

Слава, глас 6:

Днесь, вернии, сошедшеся, / воспоем и прославим преподобных мучеников / Серафима, Иоасафа и Петра, / тии бо предстоят Престолу Божию / и молятся о душах наших.

И ныне, Богородичен:

Богородице, Ты еси лоза истинная, / возрадившая нам Плод Живота, / Тебе молимся, молися, Владычице, / со святыми преподобномучениками Гуслицкими, / помиловатися душам нашим.

На Литургии

Блаженна от канона, песни 3-я и 6-я. Прокимен, глас 7: Восхвалятся преподобнии во славе / и возрадуются на ложах своих. **Стих: Воспойте Господеву** песнь нову, хваление Его в церкви преподобных. **Апостол к Тимофею, зачало 291. Аллилуиа, глас 6: Блажен муж, бояйся Господа, / в заповедех Его восхощет зело. Стих: Сильно на земли будет семя его. Евангелие от Матфея, зачало 36. Причастен: В** память вечную будет праведник:

Молитва

О, всеблаженнии угодницы Христови, исповедницы Церкви Русския пресветлии, тричисленнии мученицы Серафиме, Иоасафе и Петре, веры Православныя поборницы и всех христиан теплии предстателие!

Вы, в годину лютых гонений терпением мужеским облекшеся, оболгания и хуления злобная, еще же и раны многоразличныя от нечестивых мучителей претерпели есте и, древним мучеником подражающе, любовь ко Христу Богу

возгорелися есте.

Ныне же, Престолу Вседержителю предстояще, испросите молитвами вашими веры Православныя укрепление, Отечеству нашему на враги одоление и сыновом Российским спасение. Молитесь, да поможет Господь братии обители Гуслицкия обеты иноческия сохранить, всем же верным дарует покаяние всецелое и любовь совершенную. Будите нам твердии ходатаи пред Господем в час отшествия нашего, да со всеми святыми сподобимся в Царствии Небеснем достойно воспевати Пресвятую Троицу, Отца и Сына и Святаго Духа во веки веков. **А**МИНЬ.